

欽定平定教匪紀略

欽定平定教匪紀畧卷三十四

二月初一日駐長齡楊遇春朱勳奏言竊臣等

派令總兵吳廷剛剿辦陳四尤九股匪總兵楊

芳剿辦沔縣吳奇譚貴股匪前據探報吳廷剛

於十二日行抵寧陝之木瓜園將賊匪痛剿東

竄查此股卽陳四分股賊匪尹朝貴爲首追至

吳家堡地方賊匪搶佔山梁憑高擲石放鎗各

弁兵間有傷亡官兵剿殺愈急該匪等抗拒愈力惟時總兵祝廷彪尙未接到臣等派令隨將軍賽冲阿赴西鄉剿賊之信亦督兵窮追當卽合兵一處帶領遊擊朱福壽周貴都司宋連守備詹玉彬千總王禮劉彪等督催各官兵仰攻搶撲上下撲壓數次外委王學俸申貴甘俸劉耀國馬兵鄧士義李祥王受楊占魁胡忠等搶

上山梁間受鎗石傷叅將張起鰲守備劉藻把
總王洪謨外委鄒文泰兵丁張文華馬有才楊
成義羅文清等衝入賊隊生擒首逆尹朝貴大
旗楊大名劉功賊始潰亂當卽殺斃二百三十
餘名均割取耳記擒獲活賊四百五十五名搶
獲過山鳥礮七尊鳥鎗七十三桿旗幟三十七
面矛桿不記其數救出婦女三十二口該鎮訊

據逆首尹朝貴供稱年二十九歲湖北利川縣人向在寧陝地方種地上年在黑水峪木廂工作十一月內遇見尤九陳四楊大名劉功等說及河南直隸現俱有事我們不如大家動手隨招聚山內背板窮人數百名卽日起事連破十五六處寨子寨內搶得鎗礮正月初三日在火地裏地方尤九因搶奪糧食衣物未曾分給王

大旗彼此爭鬧致被戳死衆人卽推我爲首我
與陳四各帶千餘人分路掠食茲被官兵追殺
與楊大名劉功均被擒獲等語因尹朝貴帶傷
甚重當將該犯等凌遲處死其破寨殺人之熊
世貴等一百三十三名均一併正法被裹未久
有鄉約保釋者概與釋回該鎮等正在整頓跟
追間據探報陳四股匪在黃草坪分佔民房屯

住相距甚近該鎮等當卽分兵三路連夜前進
四更時趕至該處賊匪尙未起竄是夜風勢甚
大卽由上風拋擲火彈縱火將佔聚民房焚燒
南面逼臨大河該鎮等帶兵在街之東西兩路
堵截燒死賊匪三百餘人有於水中竄出者被
官兵殺斃一百餘人擒獲活賊六十一名零匪
五百餘名拚命過河淹斃一百餘人其餘向東

逃竄據活賊姜士偉王幅等供稱尤九陳四木
係一股尤九被王大旗戮死後以尹朝貴爲首
卽分爲兩股王大旗於今日官兵焚燒時我們
眼見殺死陳四拚命過河不知生死等語當將
姜士偉王幅並訊係真賊三十五名均卽正法
其餘被裹難民分別保釋又據總兵楊芳稟稱
該鎮派往剿辦沔縣股匪十八日行抵西江口

三元壩探明龔貴一股竄至距三元壩甚近屯
住民房該鎮親督將兵奮勇直前該匪正在集
聚一見官兵卽棄騾馬分頭搶上大山亡命奔
越經副都統銜侍衛金保二等侍衛金勤保遊
擊方一彪劉允孝馬安邦等帶領滿漢官兵首
先衝入賊隊鎗箭齊發短兵相接立時殺斃一
百餘名將賊壓下山梁經副都統銜達斯呼爾

岱等帶領吉林索倫官兵並千總張貴福藍翎
把總楊光春藍翎馬兵林懷玉等奮勇迎截前
後夾擊殄滅淨盡除落巖跌斃者不計其數共
殺賊五百六十一名均割取耳記奪獲馬騾二
百餘頭匹大礮八尊鳥鎗六十七桿刀矛九百
餘件大小旗三十六面於活賊中認出先鋒及
矛子手均概行正法投出難民二百四十二名

均經寨礮里長領歸並分別遞回原籍據活賊
僉供此股係龔貴爲首共有一千五百餘人要
由洋縣過江奔巴山老林入川因人衆糧少未
能遠竄官兵歷殺之時龔貴帶領六七百人先
行逃奔老林該鎮楊芳正欲跟追因探報吳奇
譚貴股匪由畧陽逃出大安驛擾至沔縣東關
焚燒民房向褒城舊州舖奔竄該鎮聞信卽帶

兵趕赴剿辦臣楊遇春於二十二日行抵留壩
廳屬之高橋堡知楊芳已赴沔縣其龔貴股匪
尙有六七百人無兵跟追隨一面派游棟雲帶
兵趕往會同楊芳合剿一面帶同副將何占鰲
趕辦龔貴股匪再查總兵吳廷剛自帶兵以來
屢獲勝仗並將萬五股匪剿除淨盡所帶官兵
實爲奮勉茲據該總兵將最爲出力官兵查明

保送前來臣等詳加查核謹開列清單恭呈

御覽至臣等此次辦理情形恪遵

諭旨每兵一隊剿賊一股先儘大股之賊剿辦剿完

一股再合兵共剿一股如遇零星小股隨見隨

剿務期大股全數淨盡小股不致蔓延臣楊遇

春現已星夜由留壩一帶率同副將何占鰲剿

辦楊芳打散之龔貴股匪並派總兵游棟雲帶

兵一千五百名馳赴沔縣會同楊芳剿辦吳奇
譚貴股匪此股人數較衆必須趕緊撲滅至前
次過江之賊業經將軍賽冲阿痛加殲剿在木
竹壩獲有勝仗其自江以南折回江北零匪已
派總兵祝廷彪馳往專辦其尹朝貴一股剿散
餘匪向東奔竄雖經吳廷剛跟蹤追剿臣等恐
該匪竄過鎮安路通楚豫所關甚鉅復派總兵

馬元帶兵一千名前往東路兜截現在老林內
冰雪甚大該匪勢難久藏而峪內一帶多係前
經搶掠之區恐西路各兵剿散之賊向東逃竄
馬元兵力尙單不敷分撥本日後起凱撤官兵
二千名業已到營臣長齡卽親自帶領前赴東
江口寧陝一帶如賊匪東竄卽可探蹤迎擊尙
仍匿老林並可就近調派鎮將自東向西搜剿

至峪口地方臣朱勲同副都統富僧德現帶滿
漢官兵九百餘名再添調城守營兵二百名撫
標兵一百名並督率本地團戶義勇嚴密防堵
以冀迅速蕲事奏入

上命軍機大臣傳諭長齡楊遇春朱勲曰此次吳廷
剛所剿陳四分股之賊尹朝貴股匪於十二日趕
抵吳家堡適祝廷彪到彼與之會合進兵大加剿

金史卷之九十四 卷之三十一
殺當將首逆尹朝貴生擒殲獲六百餘人旋又探
知陳四股匪在黃草坪民房屯踞復分兵三路乘
夜進攻賊匪燒斃淹死及殲獲者又有六百餘人
並訊明尤九一犯已被賊賊戮斃又楊芳所剿沔
縣賊匪將龔貴一股在三元壩地方督率馬步官
兵奮勇剿殺先後殲賊六百餘名各路官兵剿賊
均屬奮勉出力著發去四喜玉搬指五個磁翎管

十個鼻烟壺五個小刀十柄小荷包二十個一兩
重銀牌三千面分賞各路奮勇將弁兵丁並著長
齡等將各該路帶兵將領官兵查明秉公保奏長
齡等俟各路剿辦完竣再加懋賞現在長齡已親
赴東江口寧陝一帶督同吳廷剛馬元追剿尹朝
貴陳四股內東竄零匪楊遇春親赴留壩一帶率
同何占鰲追剿龔貴股匪其沔縣遊奕之吳奇諱

貴股匪已派游棟雲會同楊芳剿辦又饗沖阿所
剿折回江北之苗小一股匪亦派祝廷彪馳往會
剿朱勲等在峪外防堵各處股匪均有專員認定
剿辦不至顧此失彼惟當緊躡窮追各剿各股將
首逆夥黨就地掃除淨盡統於前二月內一律辦
竣長齡察看陝境肅清毫無遺孽卽由六百里加
緊奏聞以慰廑注

上諭內閣曰長齡等奏查明總兵吳廷剛等一路奮
勇官兵請量加鼓勵等語吳廷剛一路官兵追剿
萬五股匪連獲勝仗將首夥殲除淨盡實屬奮勇
出力加恩著照所請叅將張起鰲賞給健勇巴圖
魯名號守備劉藻著賞戴花翎都司朱連著賞換
花翎千總白玉喜劉添喜把總敖鳳李明舉外委
鄒文泰魏申甘倖申貴馬兵鄧士義張文華李祥

蒙貴王受楊占魁胡忠羅文清陳廣陳才玉晏尙
能劉文榜馬有才俱著賞戴藍翎守備詹玉彬著
以都司陞用千總王澧劉彪周炳南著以守備陞
用把總趙富王宏謨著以千總陞用俱先換頂戴
其受傷十三處擊退賊衆之馬兵楊成義尤爲奮
勇者加恩超陞千總仍賞戴藍翎以示獎勵

二月初二日癸巳賽沖阿奏言竊臣於十九日在

西鄉縣屬之木竹壩截剿竄渡漢江南岸青號
股匪殲除淨盡並將綠號苗小一股匪逼竄江
北臣卽帶兵由西鄉縣屬之老漁壩新漁壩一
路渡江進剿苗小一股匪途次復據洋縣知縣

王元亮報稱有賊匪千餘竄在縣屬之良心河
焚掠前隊數百人由太陽灘曬淺渡過漢江南
岸至渭門童家溝一帶滋擾臣查漢江南岸甫

經肅清該匪等因官兵遠在西鄉遂由洋縣地方偷渡狡黠猖狂實堪痛恨臣卽督率官兵兼程前進二十二日行至獅子溝探得涇門童家溝賊匪約七八百人在仁義溝碾子溝等處破寨殺人肆意焚掠與我兵相距百十餘里遂連夜冒雪發兵於二十三日辰刻馳抵碾子溝該匪正在烤火會食瞥見官兵均各棄食持械搶

上場後山梁負嶠抗拒臣飭令叅將朱承受蘇

勒當阿都司蘭國額守備張必祿冉玉龍等帶

兵從左路仰攻遊擊余步雲楊登魁守備徐廷

彪王文衡署守備趙廷耀等帶兵由右手山坡

抄擊賊猶抵死抗拒臣詢知賊占山梁後面有

路可通渭門太陽灘一帶隨一面派兵在左右

兩路策應一面親率協領阿嘎阿佐領蘇勒芳

阿遊擊楊逢春向春煦署守備唐文淑趙國柱
等帶兵由太陽灘一帶翻山繞出賊後兩面夾
擊該匪無險可恃紛紛棄械逃竄我兵各路追
殺沿途斃賊二百餘名滾崖撲水者甚多奪獲
刀矛四百餘件鳥鎗二十餘桿騾馬二十七頭
匹生擒活賊一百一十二名又於各山箐內搜
獲活賊一百零四名內有僞先鋒三名旗手七

名賊目六名訊據活賊偽先鋒蘇容盧俸劉成
舉供稱我們俱是上年臘月入夥在藍號黃總
兵名下做先鋒起手止有幾十個人到正月半
裏脅的狠多通共湊有千人到處搶掠破過幾
處寨子因不知南岸有兵約會紅號八九百人
由太陽灘曬淺渡過南岸想往巴山老林去昨
日傳聞官兵在西鄉木竹壩把青號打完了紅

號一股仍舊折回北岸我們這股也要過北岸
去聞黃頭子因搶得客船銀兩帶了十幾個人
乘空走了不知去向我們領著衆人正想起上
紅號合夥適遇官兵抵擋不住致被擊獲我們
這股是藍號先回江北的是紅號也有八九百
人又有綠號一千多人現亦不知去向等供當
將蘇容盧俸劉成舉凌遲處死旗手賊目及餘

竣此股若數十里百里內有賊竄至自當隨時截
殺若在數百里之外切弗窮追遠涉務當步步緊
顧川界以堵爲剿川省邊防嚴密卽所以助陝省
成功並傳知冬隆武暨桂涵羅思舉分督弁兵在
川省沿邊一帶冬設偵探加意防範其七盤關及
沿江一帶均派兵巡邏聲息相應勿稍疎懈該將
軍獨當西南要路連獲勝仗殲賊多名已著有勞

續該一路軍務卽由該將軍自行奏報無庸亟亟
往晤長齡俟陝省軍務告蒞捷報到時朕論功行
賞必將該將軍與陝省帶兵大員一體加恩也勉
之

同日章煦奏言竊臣於審辦從教逆匪霍應方
等案內究出故城縣及景州等處民人宿元漢
劉坤等入教傳徒各情節將該犯等先後獲案

解省臣逐加研鞫緣劉坤係故城縣人嘉慶十
七年六月間拜霍應方爲師教令每日朝拜太
陽口念真空家鄉無生父母八字劉坤轉傳朱
虎趙勇崔紹舞江可棟及未獲之蘇洛俊並伊
子劉六兒一同入教宿元謨先後拜從劉坤蘇
洛俊爲師王敏周把什吳進寶蕭第六韓從周
韓從順孫第三孫大有解雙全趙柱等犯均隨

同入教十八年正月內宿元謨與霍應方吳振
奎蘇洛俊前往滑縣會晤霍應璧同至李文成
家住宿一夜當各回家八月二十八日霍應方
將宿元謨等邀至家內告知李文成約期造反
並令宋二前來糾約傳給明號係奉天開道白
旗暗號係得勝二字霍應方當囑宿元謨等各
自照樣做旗前去相助約定九月十五日至霍

應璧家會齊宿元謨朱虎等畏懼未允劉坤應
允未行劉坤之子劉六兒於九月初六日攜帶
順刀白旗起身行至冠縣聞有官兵堵截當將
白旗順刀撩棄轉回而宿元謨先於上年六七
月間在夏津縣人殷峻嶺家見有推背圖一本
取回推演在附近村莊布散謠言惑衆被鄰族
赴縣首告宿元謨聞信逃走旋被獲案審訊宿

元謨應請照例擬斬立決劉坤劉六兒二犯均
請擬斬立決梟示劉坤已在監病故應戮屍與
劉六兒首級解赴犯事地方示衆朱虎崔紹舞
等及案內各犯分別問擬遣徒杖責奏結奏入
得

旨劉六兒著卽處斬同應行戮屍之劉坤均梟首示
衆宿元謨著卽處斬其餘各犯罪名著刑部核議

咨交該督分別辦理

二月初四日未山東學政黃鉞奏言查定陶縣
學教官詳稱廩生孔毓仲學錄孔毓俊增生孔
毓伯孔毓諄孔毓良生員孔傳爐孔傳錦孔傳
璧等助官剿賊同時陣亡並被賊殺傷本莊人
口五百有餘被害最爲慘毒又金鄉縣學教官
稟稱增生李九標前因首告教匪被賊匪李卓

欽定四庫全書
卷三十一
立銜恨焚燬村莊以致無家可歸而該生卒能
設法將謀逆在逃諸犯親身擒獲當經移咨撫
臣辦理合無仰懇

皇上天恩先將孔毓仲等旌獎以慰忠魂再查定陶
縣武生孔廣運入教從逆業經拏獲正法請將
失查之定陶縣教諭郎謙牧訓導方運景革職

奏入

上諭內閣曰山東學政黃鉞奏查明曹屬生員捐軀
就義者請加恩獎等語上年九月間逆匪擾及定
陶學錄孔毓俊生員孔毓仲孔毓伯孔毓淳孔毓
良孔傳爐孔傳錦孔傳璧等助官剿賊同時陣亡
並被殺傷本莊人口五百有餘實堪嘉憫著加恩
交部照例議卹

上又諭內閣曰失察武生從逆之山東定陶縣教諭

金匱要略卷三十四
郎謙收訓導方運景俱著革職

上命軍機大臣傳諭同興曰黃鉞奏據金鄉縣教官稟稱生員李九標前因首告教匪被賊李卓立銜恨焚燒村莊以致無家可歸該生設法將謀逆在逃諸犯親自擒獲當經該學政移咨撫臣辦理等語該生員知有教匪卽先行首告破案並將逃逆犯設法擒捕尙屬明於大義自應加以獎勵該

撫現在作何辦理未據奏到著卽查明覆奏

二月初五日申長齡楊遇春朱勳奏言據祝廷

彪稟稱探知陳四自黃草坪經官兵痛剿後實

止逃逸五百餘人復與尹朝貴股內零匪合夥

並到處褻脅又有千餘人因官兵緊躡該逆等

捨命由老林東竄仍分爲兩股以圖牽制該鎮

等聞信亦卽分兵兩路進追吳廷剛緊跟尹朝

貴零匪祝廷彪緊跟陳四股匪祝廷彪拏獲賊探訊知該逆等因官兵緊躡又知有總兵馬元防堵東路意欲由金竹園乘夜遶赴石泉祝廷彪卽帶兵改道金竹園直至手扳崖緊躡賊尾該逆等齊隊占住山梁與我兵接仗該處山梁三層賊匪分隊占據經游擊朱福壽守備劉國蔭帶兵仰攻詎賊匪放鎗施石併力下壓該鎮

親領官兵奮勇撲攻鎗箭齊發兩時之久賊匪並不退縮藍翎外委劉耀國首先戳斃執旗賊匪一名又兵丁文朝元生擒執旗賊一名賊始畏懼退至第三層山梁官兵乘勢搶上適都司党聯陞藍翎千總劉明周牛添喜等遠路由山背抄上壓殺該逆等力不能支官兵愈加奮勇自辰至酉計殲斃賊匪三百餘人孥獲活賊二

百五十四人搶獲大礮二尊大小旗十三面騾馬五十餘頭匹鳥鎗四桿矛桿二百餘根餘匪仍竄入老林天已昏黑難以進剿該鎮卽撤下官兵向老林分佈設卡次日黎明正在入林搜拏該逆等在林內聲稱情願投首並不交出器械該鎮料知賊情狡詐但入林搜捕轉恐漏網必須設法誘出山梁遂佯令弁兵走入賊隊傳

知准其交械投首密認陳四面貌服色仍整齊
隊伍並分派官兵四路設伏聽礮爲號該逆等
以爲中計數百人喊聲如雷由林內衝出官兵
聞礮四路圍殺該鎮親自在前激勵衆兵務將
陳四生擒不許一名免脫把總李明舉胡貴衝
入賊隊生擒陳四僞先鋒劉朝品汪正榜等其
餘被官兵全行殺斃並無一人得脫此次接仗

官兵間有傷亡現將首逆陳四解候審辦訊明
活賊均卽正法良民遞籍歸業同日又據吳廷
剛稟稱該鎮追剿尹朝貴零匪行抵賀家灣該
匪無路逃竄靠山屯紮我兵分爲兩路派叅將
張起鰲守備詹玉彬帶領兵勇夾攻該匪等抵
敵甚力我兵不避鎗石爭先衝擊該鎮鼓勇前
進殺死二百餘名生擒一百十八名全數淨盡

搶獲烏鎗八桿紅黃旗五面矛桿二百餘根訊
據活賊趙文斌供稱尹朝貴被擒後止餘二百
餘人途遇陳四股內苟紅張老么帶來二百餘
人遂與陳四合夥因官兵緊追又分作兩股希
圖牽制現在陳四在前一股逃至金竹園一帶
並我們在後一股俱被官兵殲擊無遺復訊據
獲犯張老么苟紅供亦相同當將該犯及訊明

從賊已久持械抗拒者九十三名悉予正法其

被裹脅確有保領者即行釋放臣等現已委員

迎提陳四親訊另行錄供具奏臣長齡因尹朝

貴餘匪東趨陳四又復竄逸是以前經奏明趕

赴東路剿辦茲接到祝廷彪等來稟此股既經

淨盡東路已就肅清可以放心其沔縣一股計

楊芳亦應日內見仗又有將軍賽冲阿在漢南

一路定可一鼓蕩平臣楊遇春現辦之龔貴股

匪雖係楊芳剿敗之賊人數亦尙不少一經痛

剿賊匪知各路有兵必仍折回北竄並據寶雞

縣稟稱東河橋地方有不知姓名賊匪千餘人

執旗搶掠現已入山有赴隴州之勢未識此股

卽係龔貴股匪抑係各路剿散零星匪會合均未

可定臣長齡卽帶領特依順保色爾滾並滿漢

官兵二千餘名由斜峪前進探蹤追剿以龔迅
速蒞事奏入

上命軍機大臣傳諭長齡楊遇春朱勳曰長齡等奏
生擒首逆陳四並將尹朝貴零匪全數殄滅惟聞
招內稱寶雞縣東河橋地方有不知姓名賊匪千
餘人執旗搶掠現已入山有赴隴州之勢等語此
股是否係龔貴股匪抑係各處零匪復行聚合現

在長齡已親自帶同特依順保色爾滾並滿漢官
兵二千名由斜峪關探蹤進剿務須迅速撲滅勿
任四散旁竄現在東竄股匪剿除淨盡又有吳廷
剛祝廷彪兩路勝兵長齡等酌看情形何路緊要
卽令該鎮等前往協助或分往或合往隨時調度
朕亦不爲遙制至沔縣境內吳奇譚貴一股竄匪
人數較多楊芳在彼剿辦又有游棟雲帶兵前往

協助日內已否得有勝仗殄除淨盡又楊遇春現
辦龔貴一股並賽沖阿跟剿之苗小一一股日內
曾否掃除漢江一帶及棧道內外是否均已肅清
並著迅速奏聞

上又命軍機大臣傳諭方受疇曰前因陝省陳四等
股匪經官兵追剿東竄鎮安寧陝邊界長齡等分
派官兵馳赴商州山陽一帶截剿商州龍駒寨等

處毗連豫省邊境當經降旨飭令南陽鎮總兵呢瑪善選帶弁兵一千名前赴該處紮營防堵本日據長齡等奏報賊匪陳四與尹朝貴餘匪合夥一千餘人由黃草坪改道金竹園分竄經總兵祝廷彪吳廷剛跟蹤緊躡分兵追至手扳崖賀家灣等處奮力剿捕共計殲斃賊匪五六百人擒獲三百餘人並將逆首陳四生擒此股賊匪業已全數殲

擒陝省東路肅清豫省西界可不須派兵防堵著
方受疇接奉諭旨卽飛檄呢瑪善將所帶防兵撤
回歸伍仍留心察探鎮撫地方爲要

上諭內閣曰長齡等奏生擒首逆陳四並尹朝貴等
匪全數殄滅一摺覽奏欣慰感謝

天恩不盡陳四係首先倡亂之犯前在小王澗糾衆起
事節經吳廷剛帶兵痛剿該逆自黃草坪潰逃之

後復潛與尹朝貴零匪合夥旋又分股東竄牽制官兵此次祝廷彪緊躡陳四股匪訊知該逆遠赴石泉遂乘夜由金竹園前往在手扳崖地方接仗數時之久先經殲獲賊匪五百餘人戮斃執旗賊目一人次日正在搜林該逆等狡詐多端輒在林內詭稱投首經官兵設伏前進賊匪從林內衝出伏兵四起將該逆生擒餘匪全行殺斃無一得脫

其吳廷剛緊躡尹朝貴零匪至賀家灣地方該匪知無路可竄靠山抗拒官軍分爲兩路吳廷剛並親自帶兵抄至賊後三面攻擊殲獲三百餘名此股亦全數剿盡所辦均爲可嘉祝廷彪將起事首逆督兵生擒實屬奮勇出力著加恩賞加提督銜仍交部從優議敘吳廷剛此次所剿雖係尹朝貴零匪而南山賊匪自起事以來吳廷剛首先帶兵

剿捕緊躡賊蹤不予以暇先將萬五大股賊衆追
剿潰散以後官軍乘勝屢奏捷音其功亦復不小
吳廷剛亦著賞加提督銜並交部從優議敘其銜
入賊隊生擒陳四之把總李明舉胡貴著加恩超
陞守備戮斃執旗賊目之外委劉耀國著加恩以
把總陞用長齡行抵陝省後各路領兵將領連得
勝仗生擒首逆該督調度有方著加恩交部議敘

並賞給長齡四喜玉搬指一個玉吉祥牌一面玉
翎管一個黃辮大荷包一對小荷包二個賞給祝
廷彪吳廷剛四喜玉搬指各一個玉翎管各一個
玉柄小刀各一把黃辮大荷包各一對小荷包各
二個又頒發玉翎管五個堪達罕搬指五個小刀
十把荷包十個一兩重銀牌四百面分賞出力將
弁兵丁以示鼓勵

同日常明奏言竊臣接據賽冲阿來信內稱陝

西金水河股匪由洋縣之金溜子躡淺渡江南

竄八寶臺一帶等語查八寶臺地方與西鄉石

泉接壤現在賊已竄至該處卽與川省之太平

通江南江巴州一帶緊連現在桂涵雖已帶兵

由廣元馳赴通南一帶會同羅思舉防剿但該

匪一渡漢江入川之路叢雜綿長桂涵羅思舉

二人勢難兼顧卽前派官兵一經分投迎剿尙
覺過單臣復行飛調川東兵一千五百名添交
桂涵羅思舉管帶併赴太平城口一帶協力堵
剿又調軍督提三標兵一千名建昌兵一千名
川東兵五百名臣親自帶領並帶同重慶鎮總
兵羅聲臯馳赴通南巴州一帶探明洋縣匪徒
於何處竄入川境卽由何處取道進剿並將前

調之懋功阜和等營兵二千名催令迅速趨行
交多隆武帶領專顧廣元一路至隴州一股賊
匪聞已竄至階文與川省之龍安南坪連界臣
已於松潘鎮屬各營派兵八百名分撥防堵以
期有備無患

成都副都統東林奏言竊查陝省洋縣賊匪由
金溜子躡淺渡江竄至八寶臺一帶滋擾賽沖

阿已由沔縣帶兵前往剿辦常明接到賽沖阿
來信當卽親帶官兵馳赴通南一帶探蹤迎剿
自可毋庸再添兵力惟聞陝省南山及黑河隴
州一帶尙有數起賊徒一經官兵追剿難保其
不逃竄入川而川省沿邊道路綿長似非厚集
兵力不足以資派撥查八旗駐防滿兵自陝省
用兵以來屢次呈請出兵及時報効臣擇其年

力強壯技藝尤精者預行挑出五百名倘再有
需兵之處卽將此項官兵調往可期得力均奏
入

上命軍機大臣傳諭常明日常明奏陝匪南竄親帶
官兵馳往迎剿一摺所奏過涉張皇洋縣渡江股
匪節據賽沖阿奏報剿辦完竣其折竄江北零匪
亦僅止千餘人經賽沖阿等帶兵剿捕無難立就

掃除川界東北一帶現飭多隆武桂涵羅思舉督
率弁兵扼要分防足資守禦省城地方緊要理宜
鎮靜撫綏常明一接賊匪渡江之信卽紛紛徵調
帶領多兵輕率遠出致令人心驚疑實屬不知緩
急著傳旨申飭常明途次如續聞賽冲阿剿賊獲
勝之信卽帶兵轉回尙爲曉事倘已赴通巴一帶
著接奉諭旨速回省城鎮靜彈壓並飭知重慶鎮

總兵羅聲臯卽回本任所調之軍督提三標及建
昌兵二千名均令回營歸伍如慮沿邊兵力稍單
將已調之川東兵二千名分撥一千就近交桂涵
羅思舉管帶防堵可也

上又命軍機大臣傳諭東林曰東林奏預挑駐防滿
兵五百名以備調撥一摺洋縣渡江竄匪節經賽
冲阿剿除殆盡其由老漁壩折竄江北股匪現經

賽冲阿帶兵在洋縣一帶堵剿諒可就近掃除川
省邊界又有多隆武桂涵羅思舉等分督弁兵防
守足資備禦省城地方緊要自宜鎮靜駐守本日
常明奏親督官兵赴通巴一帶防堵已屬張皇東
林不識事體輕重並挑備駐防滿兵多名豈不令
人心惶惑所辦尤屬輕率東林著傳旨申飭所挑
官兵卽傳令安靜駐守勿得輕舉妄動

臣等謹按南山匪徒滋事之日卽蒙

聖慮籌念川境邊防徵兵堵禦賽冲阿甫馳抵沔縣
已有躡淺渡江之賊倘稍緩旬日豈能迅挫
賊鋒扼其入川之路

先幾制勝實已算無遺策維時陝境分竄股匪鋌走
無方當羽檄倥偬之際人情易涉驚惶仰惟

皇上肝宵籌筆全局在胸計山內逐寇之師分股專

辦兵力已屬有餘西南一面責成賽沖阿率
領勝兵以剿爲堵冬隆武桂涵羅思舉等扼
要分防無虞竄逸於川陝數千里之內軍情
賊勢

瞭如指掌是以

佈置周密

天網四張雖獸駭禽奔無能肆其狡逞之技常明一

聞警報輒紛紛調發輕離省垣東林亦挑出
滿兵多名預備續派仰蒙

聖明訓飭

示以鎮靜之方並將所調各兵撤回歸伍俾不致傳
聞惶惑彼徒見賽冲阿奉檄星馳亦遂厲兵
尋食而不知先後緩急情形迥不相同其於
睿算神謨奚能仰窺萬一也哉

二月初六日丁酉賽沖阿奏言竊臣前於續竄漢

江南岸匪徒剿辦完竣後卽督兵渡江星夜疾

馳二十七日申刻追及賊衆於洋縣屬之店子

河紅號綠號股匪已合成一路共約二千餘人

佔據兩座山梁阻水負嶠作勢抗拒臣派令叅

將朱承受遊擊余步雲帶兵躡淺渡水奮擊左

手山梁之賊臣親率將弁直搶右手山梁該匪

於山腰施放鎗礮拋擲石塊勢極鴟張經我兵奮勇爭先鎗箭齊發殺死賊匪前敵百餘名搶獲大礮三尊鳥鎗四十七桿旗幟刀矛無算餘賊翻山奔竄卽催兵追殺二十餘里又斃賊百餘名生擒一百三十五名因天已昏黑不辨路逕暫行紮營店子河邊二十八日四鼓復督兵追躡疾馳九十餘里沿途拏獲落後匪徒訊知

賊衆竄向北巖子寨家嶺隨分遣叅將朱承受
蘇勒當阿守備王文衡徐廷彪冉玉龍由牛家
溝從左路抄寨家嶺之前遊擊余步雲楊逢春
守備張必祿署守備唐文淑李應龍帶兵由小
王廟抄赴寨家嶺之右臣親率協領阿嘎阿佐
領候補叅將蘇勒芳阿開復遊擊向春煦候補
遊擊楊登魁署守備趙廷耀趙國柱帶兵緊追

至北巖子地方該匪正在山巖官兵施放鎗礮
向山攻擊賊匪不敢抗拒四散奔逃經官兵一
路圍殺又斃賊三百餘名生擒一百九十八名
並經遊擊余步雲率領奮勇弁兵生擒紅號逆
首偽總兵羅懷卽羅小一又經三路官兵生擒
偽先鋒劉添華田登連伍名昌綠號偽先鋒劉
高鮑成馬審藍永寧劉貴九名計兩日內共擒

斬賊匪幾及千名又據派出搜捕官兵擊獲零星逃匿匪徒一百十三名訊據賊首偽總兵羅懷卽羅小一供稱年二十六歲四川涪州人並無父母妻子此股紅號起手大頭子是楊二劉濫子楊二因招降爲本號之人所殺劉濫子在兩河打仗衝散亦被寨民捉去殺死衆人稱我偽總兵聽我管束我因官兵追剿與綠號苗小

一合夥被官兵追殺拏獲如今青號楊榮一股已經剿淨藍號黃老五一股亦俱殺完黃老五又名王五聞彼未見官兵先已逃走現在只有綠號苗小一帶同幾百人竄逸至黃號段總兵股內約有二三百人不知現在何處等供質之紅號偽先鋒劉添華及綠號偽先鋒劉高等供亦相同臣審明後即將逆首偽先鋒等九名凌

遲處死並賊匪二百六十五名概行處斬其餘
被脅難民計男婦一百八十六名口立時給票
釋放臣前因逆首黃老五潛逃卽派兵搜捕據
寨民等僉稱該匪擁衆往來滋擾切齒已久於
二十四日瞥見該逆獨自奔逃當卽打傷網送
寧陝鎮總兵吳廷剛軍營臣札詢吳廷剛接據
覆稱該鎮於二十四日在賀家灣行營有水田

坪民人細送帶傷賊匪一名王五因剿賊緊急
難於帶解當卽正法是此時僅有緣號逆首苗
小一尙未弋獲苗小一現竄向女兒壩一路吳
廷剛現在茅坪距女兒壩甚近已飛札該鎮探
蹤截擊仍於本營挑派奮勇官兵五百名令遊
擊余步雲帶領連夜窮追臣拜摺後亦卽帶兵
繼進務卽殲除現在漢江一帶查無黃號股匪

名目或早已解散或經別路官兵剿除均未可
定至逃散餘匪臣一面派兵搜捕一面飭知各
處洞寨鄉民一體緝拏

上命軍機大臣傳諭賽沖阿並諭長齡楊遇春朱勳
曰此次紅號綠號股匪合夥奔竄賽沖阿督兵追
剿於二十七二十八兩日在店子河寨家嶺等處
痛加剿殺擒斬幾及千名又搜獲逃匪匪徒一百

餘名並將紅號逆首羅懷卽羅小一及偽先鋒劉
添華等八名拏獲前此在逃之藍號逆首黃老五
卽王五亦據查明經寨民打傷送交吳廷剛處正
法所辦甚好此時苗小一股匪向女兒壩一帶奔
竄吳廷剛已到茅坪距女兒壩甚近賽冲阿現札
知該鎮迎頭截剿一面率兵窮追前後兩面夾擊
自不難將此股迅速辦淨現在漢江以南全境肅

清無須川省添兵堵剿昨據常明奏稱親自帶兵
馳赴通巴剿賊東林亦有挑備滿兵五百名之奏
皆屬輕率已降旨申飭令常明速回成都著賽沖
阿卽就近將剿賊得勝情形知照常明令速撤兵
歸伍無令川民聞風惶惑目下陝省股匪俱經官
兵痛剿所剩無多惟吳抓抓一股楊芳現由漢中
抄道截殺龔貴一股楊遇春亦由沔縣一路探踪

追擊此外隴州一帶尙有無名賊匪千餘名長齡亦已親自帶兵由斜峪關追剿各路兵力厚集賊勢窮蹙已甚賽沖阿並飭知各處碉寨民人堅壁清野遇有逃匿匪徒立時緝送更可爲搜捕零匪之助看來前二月內當可一律肅清賽沖阿現由南而北長齡由北而南軍營日近可以聲息相通指日各路賊匪掃除淨盡賽沖阿會同長齡楊遇

金史卷之九十四 列傳第九十四 三十一
春朱勲查明漢江南北南山內外及老林中實無
遺孽伊四人卽聯銜由六百里加緊奏報全境肅
清捷音一至佇膺懋賞勉之其此次生擒首逆羅
懷之遊擊余步雲甚屬勇往著加恩以叅將陞用
並著賽沖阿查明該員如未得花翎著賞戴花翎
如已有花翎卽奏聞賞給勇號所有賽沖阿一路
節次出力官弁兵丁著該將軍自行查明秉公保

奏不可冒濫亦不可遺漏奏到之日再降恩旨

陝甘學政韓鼎晉奏言竊查南山賊匪正當剿辦之時一經搜捕淨盡善後事宜在在均關緊要臣聞見所及不敢拘泥職守壅於上

聞茲謹臚陳敬備

採擇一南山內宜急行堅壁清野之法易於剿捕淨盡也南山逼近老林處處與川省相通該匪等

隨處掠食搜捕匪易惟有嚴飭南山內外各寨
礮村堡固其垣墉將糧食搬徙囤藏嚴密自守
使其野無所掠不過數日卽已困斃首逆無難
立獲一嚴禁弁兵擄掠難民子女以全良善也
查搜捕匪徒之時弁兵等每不分良莠任意擄
掠應請

勅下領兵大員嚴飭弁兵於投出婦人子女中審係

逆黨固應照例緣坐其實係良民婦人子女概
從省釋倘弁兵等妄行擄掠務須有犯必懲一
南山毗連各州縣曾經滋擾之地宜慎選賢能
也南山地極綿長當匪徒滋擾之時全在地方
官守護城池撫綏黎庶並籌辦防堵事宜刻下
大兵雲集立就肅清所有善後諸務俱關緊要
該處地方州縣必須有守有爲之吏實力撫綏

金史之文書自是身
卷三二
應請

勅下督撫等嚴爲甄別如人地稍有未宜卽另揀賢
能之員調補不必拘以成例以上各條臣訪聞
所及據實奏

聞伏候

訓示奏入

上命軍機大臣傳諭長齡楊遇春朱勳曰據韓鼎晉

條奏南山內剿賊善後事宜一摺此次南山匪徒
經各路官兵截擊殲擒過半零匪日益窮蹙無難
尅期掃除淨盡惟該處山徑叢雜賊蹤四竄必盡
杜其劫掠裹脅之路則蕺事更速卽如每次破賊
搜獲鎗礮器械等件皆係該匪等就各寨碉搶掠
所得可見守禦不堅卽資寇兵而齎盜糧著長齡
等卽飭令南山內外各寨碉村堡將糧食搬聚合

併固守俾竄匪所到無可得食則搜剿更易爲力是卽堅壁清野之遺意也至用兵所以衛民必須於所過地方秋毫無犯方爲紀律之師其克賊有功之弁兵自必加以陞賞若擄掠婦人子女軍法在所不宥卽逆犯家屬例應緣坐者亦自有國法辦理尙不當縱令弁兵擄掠若將難民子女從而擄掠此與賊何異著長齡等嚴飭領兵各鎮將約

東弁兵申明紀律如有擄掠婦人子女者立即究
明從重辦理其賊中投出之婦人子女除逆黨緣
坐外訊係被賊裹脅者妥爲省釋無俾失所再南
山毗連各州縣一應撫綏安輯事宜均關緊要非
精明強幹實心任事者弗克勝任著長齡朱勳於
剿賊事竣後察看各州縣內如有闕茸廢弛者卽
嚴行甄別另揀賢能之員奏明調補以期除莠安

良整頓地方